



Fundasaun Mahein (FM), 11 Dezembru 2023

Komunikadu Imprensa

Pareser ba Komisaun B Parlamentu Nasional kona-ba Proposta Lei Orsamentu Jeral Estadu 2024 ba Setor Defeza, Seguransa no Negósiu Estranjeiru

Iha loron 21 Novembru 2023 Konsellu-Ministru aprova proposta Lei Orsamentu Jeral Estadu (OJE) ba tinan 2024 ho montante biliaun \$1.95 no Governu apresenta ba Parlamentu Nasional iha loron 24 Novembru 2023 no Primeiru-Ministru husu atu halo debate ho karakter urjente. Parlamentu Nasional ho Governu hahu halo audensia públiku ba proposta Lei OJE 2024 iha loron 30 Novembru 2023 no ramata iha loron 5 Dezembru 2023. Ho ida ne'e, Fundasaun Mahein (FM) hakarak fahe ninia observasaun nune'e bele ajuda di'ak liu tan Deputadu sira Komisaun B hodi halo desizaun kona-ba Proposta Lei OGE 2024 ba setor defeza, seguransa no negosiu estranjeiru.

Ministériu Defeza konsentra iha programa defeza nasional, funksionamentu no dezvoltamentu institusional, no inkluzoan sosial. Ho nia orsamentu ba tinan 2024 Ministériu Defeza propoin ho total US\$ 11,192,358. FM hakarak fahe ami nia observasaun ligadu ho alokasaun ba Ministériu Defeza iha Proposta OJE ba 2024. Alokasaun US\$ 2 milloens ba Kapital Dezenvolvimentu iha programa Defeza Nasional, alokasaun ne'e ba "Construção Novas Infraestrutura Defesa e Militar". Maibe, la iha tan informasaun kona-ba infraestrutura saida maka sei konstrui ho orsamentu ne'e. Tamba ne'e hamosu pergunta alokasaun ne'e ba saida los, no Governu preziza klarifika oinsa alokasaun ne'e sei kontribui ba atinjimentu Objektivu Mediu-Prazu programa Defeza Nasional nian, katak "As pessoas de Timor-Leste estão seguras e protegidas contra ameaças externas".

Iha tinan 2024 F-FDTL konsentra iha programa defeza nasional, funksionamentu no dezvoltamentu institusional ho nia orsamentu hamutuk US\$ 35,110,177. Husi alokasaun \$14,378,023 iha programa Defeza Nasional kategoria Bens no Servisus, FM nota katak US\$12,920,313 sei aloka ba *catering* (fornesimentu hahan) iha Quartel General F-FDTL (bele hare'e Livro Desenvolvimento Orcamentais (despeza tuir klasifikasaun orgániku no ekonómiku), pájina 94. FM nota katak OJE 2023 aloka montante ne'ebe besik hanesan (US\$12.35 milloens) ba *catering* iha F-FDTL. Klaru katak F-FDTL nia estrutura la hanesan instituisaun estadu sira seluk, no possibilidade F-FDTL preziza orsamentu ba fornecimentu hahan ne'ebe bo'ot liu. Nune'e mos, wainhira ita kompara alokasaun besik US\$13 milloens ba *catering* ne'e ho orsamentu ba saláriu, bele haree orsamentu saláriu US\$16 milloens deit. Maske nune'e, FM hanoin Governu preziza fo espikasun klaru kona-ba alokasaun espesifiku ne'e.

Iha tinan 2024 Ministériu Interior nia programa maka seguransa nasional no funksionamentu no desenvolvimentu institusional ho nia orsamentu hamutuk US\$ 16,193,256. Iha tinan 2024 FM sujere Ministériu Interior tau mos prioridade ba elaborasaun ba Polítika Seguransa Nasional (PSN). FM konsidera PSN nu'udar prioridade boot ida hodi orienta estadu nia programa defeza no seguransa interna no esterna sira hotu. Maibe to'o agora PSN seidauk elabora. Nune'e ami konsidera Governu prezisa tau alokasaun orsamentu espesífiku atu desenvolve PSN.

PNTL iha tinan 2024 konsentra iha programa tolu hanesan seguransa nasional, funksionamentu no desenvolvimentu institusional no inkluzo sosial ho nia orsamentu hamutuk US\$ 47,701,715. FM sujere iha tinan 2024 Governu prezisa kontinua tau prioridade ba Estudu Estratéjiku ba PNTL hanesan temi ona iha PESI 2030. Iha elaborasaun estudu ne'e nian Polisia Komunitária tenke sai nafain filozofia no estratéjia polisiamentu PNTL nian. Nomos polisiamentu komunitária implementa iha nível hotu-hotu unidade, servisu no departamentu PNTL nian. Hosi Estudu estratéjiku PNTL nian introduz nafatin VIP (vizibilidade, Involvimentu no profesionalismu) sai nu'udar doutrina polisial no kaer metin nafatin ba ninia filozofia. Nune'e PNTL vizível iha fatin hotu-hotu, envolve comunidade iha asaun sira polisial nian no hatan ho profesional.

Iha tinan 2024 MNEC sei implementa programa rua maka política externa Timor-Leste no funksionamentu no desenvolvimentu institusional no nia orsamentu hamutuk US\$ 30,279,565. Ba tinan 2024 FM sujere MNEC hahu diskute no elabora dokumentu importante ida liga política externa Timor-Leste nian maka Livru Mutin Política Externa. Dokumentu ne'e liga mos ho interese estratéjiku Timor-Leste nian iha âmbito kooperasaun bilaterais no integrasaun rejional.

SNI iha tinan 2024 nia programa konsentra iha seguransa nasional no funksionamentu no desenvolvimentu institusional ho nia orsamentu hamutuk US\$ 2,684,182. Iha tinan 2024 FM kontinua sujere Governu halo revizaun ba kuadru legal no kriaun estatutu pesoal SNI nian nu'udar pasu pozitivu hodi hametin profesionalismu SNI. Nune'e mos hadi'a dezafiu ohin loron nian, liu-liu iha espasu sibernetiku nian tenke investe mos iha inteligênsia sibernetika, liu-liu iha mundu globalizadu ohin loron iha ne'ebé sistema hotu-hotu inklui governasaun nian sai dijitalizadu. Ho nune'e, importante ba entidade seguransa liu-liu servisu inteligênsia prezisa adapta-an ho realidade mundu dijitalizadu ida ne'e. Liu-tan ho planu *cabo submarino* ne'ebé sei mai prezisa mos kondisaun seguransa ba infraestrutura vital refere.

Iha tinan 2024 PCIC konstentra iha programa rua maka asesu ba justisa no funksionamentu no desenvolvimentu institusional ho nia orsamentu hamutuk US\$ 2,211,304. Tinan 2024 FM sujere Governu halo alterasaun ba *Lei Organização Investigação Criminal* (LOIC) no reforsa fila-fali PNTL iha área investigasaun kriminal. Tamba ne'e FM apoiu programa Governu nian kona-ba reforma no kapasita PCIC ne'ebé ba oin sei tutela hosi Komandu PNTL, ho objetivu atu hametin ninia kapasidade ba asoens kona-ba prevensaun, detesaun no investigasaun. Investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

Rekomendasau

FM rekomenda ba Komisaun B Parlamentu Nasional no IX Governu Konstitusional iha tinan 2024 tau prioridade ba asuntu estratéjiku sira iha setor defeza, seguransa no negósiu estranjeiru. Hanesan elaborasaun, produsaun no aprovasaun ba política seguransa nasional, defeza nasional, política externa no planu estratéjiku seguransa interna nomos estudu estratéjiku PNTL. Nune'e mos reforsa servisu patrullamentu no informasaun PNTL hodi identifika no prevene hahalok sira ne'ebé potênsia mosu krime. Ikus liu, reforsa servisu intelijênsia, liu-liu rekolla, analiza informasaun no promove intelijênsia sibernética iha Sistema Nasional Intelijênsia.

Aleinde ne'e, FM husu Komisaun B atu husu klarifikasaun husi Governu kona-ba alokasaun orsamental espesífiku balun liga ho setor defeza no seguransa, liu-liu despeza ne'ebé bele konsidera esesívu ka la refleita ho realidade iha rai laran, ka la fo kontribuisaun klaru ba objetivu institusionál sira.

Atu hetan informasaun kle'an halo favor kontaktu:

Fundasaun Mahein

Email: mahein2009@gmail.com

Telemovel: (+670) 75771766

Website: www.fundasaunmahein.org